

Dithero tsa Tirelano mo Kutlwanong

29/2014 Ka Sontaga o o boidwang Kantate, e le ka 18. 05. 2014

MO LEINENG LA MODIMO O E LENG RARA LE MORWA LE MOWA O O BOITSHEPO!

1. Sefela sa 183 - 169/-

2. Thapelo: Morena, re a go leboga, ka o re senoletse sefela sa ga Moše le sefela sa Kwana ya gago. O re thuse gore rotlhe re ithute go opela sefela sa ga Moše se se reng ke wena Modimo Motlhodi wa legodimo le lefatshe yo o tshwanetsweng ke tlotlo, re be re ithute go opela sefela sa Kwana se se reng: "Kwana e e tlhabilweng e na le tshwanelo ya go tshola thata le khumo le botlhale le nonofo le tlotlo le kgalalelo le poko. A poko le tlotlo le kgalalelo le puso e nne tsa yo o ntseng mo sedulong le tsa Kwana go ya bosakhutleng!" Amen.

3. Epistolo ka fa thulaganyong ya 2 e kwadilwe mo go Bakolose 3:12-17;

Efangele ka fa thulaganyong ya 1 e kwadilwe mo go Matheo 11:25-30.

4. A go ipolelwe tumelo ya bokeresete!

5. Sefela sa 17 - 17/18

6. Thapelo ya mmadi wa thero.

7. Epistolo ka fa thulaganyong ya 6 e kwadilwe mo Tshenolong 15:2-4, e re: "Ka ba ka bona sengwe, e kete lewatle la galase le le tlhakanyeng le molelo, le ba ba fentseng sebata le setshwantsho sa sona le palo ya leina la sona ba eme fa lewatleng la galase, ba tshotse diharepa tsa go baka Modimo. Ba opela sefela sa ga Moše, motlhanka wa Modimo, le sefela sa Kwana ba re: 'Ditiro tsa gago di dikgolo, di a gakgamatsa, Morena, Modimo, Mothatayotlhe; ditsela tsa gago di siame, ke tsa boammaaruri, wena Kgosi ya merafe. Ke mang yo o se kitlang a go boifa Morena, a galaletsa leina la gago? Gonne o boitshepo o le wesi; merafe yotlhe e tla tla, e obamela fa pele ga gago; ka gonne ditiro tsa gago tsa tshiamo di senogile.'" Amen.

8. Thero: Barategi mo Moreneng, Sontaga wa kajeno o bidiwa Kantate. Ke gore opelang! Ke gona Epistolo e re rutang kajeno go opela sefela sa ga Moše, le sefela sa Kwana. Ka Epistolo re a bolelelwa gore baengele ba opela difela tseo. Difela tsotlhe tse di opetsweng ke Moše di ka akarediwa ka temana e e reng: "Ke tla baka leina la MORENA, ke re: Neelang Modimo wa rona tlotlo!" Ke Modimo, Motlhodi wa legodimo le lefatshe yo o tshwanetsweng ke tlotlo, ene a le esi fela. Sefela sa Kwana sona se ka akarediwa ka go boelela ka metlha gore ke yona Kwana ya Modimo e e tlosang boleo jwa lefatshe. Kwana ya Modimo e e leng Jesu ke Mopholosi wa batho botlhe ba dipaka tsotlhe ba merafe yotlhe.

Moše ene o ne a tshwanetse go ithuta sefela sa gagwe ka ditirafalo tse di rileng. E ne e le tshwanelo gore Morena a mo rute. Moše e ne e le morutwa yo o ineetseng go rutwa tota. O ne a na le dinyaga tse di 40, fa a ne a bolaya Moegepeto. Morena a mo raya a re: "Ga ke rate gore tiro ya me e dirwe ka tsela e e ntseng jalo. O ye mo sekakeng pele, o ithute tsela ya me ka dinyaga tse di 40, fa ke sa rate go golola morafe wa me ka tsela ya gago, mme ke tla o golola ka tsela ya me." Morago Moše o ne a ipolela a re: "MORENA o tla direla morafe wa gagwe tshiamo." Ga a tlhoke Moše go direla morafe ga gagwe tshiamo. Pusoloso ke ya Morena. Ene o tla busolosa, Baroma 12:19; Doit. 32:35-36. Mme mo sekakeng Moše yo mogologolo o ne a ise a swe. Mo kolobetsong ke tshwanelo gore Atame yo mogologolo a nwediwe, a swe. Ke se se tshwanetseng go dirafala mo modumeding mongwe le mongwe. Mo go bone ba ba fiwang tiro ya moeteledi-pele mo phuthegong ya Morena ke tshwanelo gore le ene Moše yo mogologolo a bolawe ka malatsi otlhe. Mo tseleng ya go boela kwa Egepeto "MORENA a mo tlhasela, a re: O a mmolaya," Eks. 4:24.

Moše yo mogologolo o ka re: O gopotse gore Morena o ntlhoka morago ga dinyaga tse di 40. Ke fa Morena a mmolelela gore le e seng ka tsela eo, Moše! Ke rata gore o nne modiredi wa me. Ke rata go go romela kwa Egepeto, mme o se ka wa gopola gore ke a go tlhoka. Ke tla kgona go dira tiro ya me, le fa o se yo. Le ka nako e nngwe go ne go batlega gore Moše a gakololwe, fa Morena a sa batle go dira tiro ya gagwe ka fa Moše a gopotseng ka teng. Ke fa Moše a rata go phimolwa mo lokwalong lwa Morena mo boemong jwa morafe. Le foo o ka re: Morena o ne a mmolelela gore le e seng ka tsela eo, Moše. Ga ke tlhoke mongwe wa lotso lwa ga Lefi yo o tla tsenang mo

boemong jwa batho go ba ntshetsa tetlanyo, le go nna thuananyo ya bona. Setlhabelo sa tetlanyo le thuananyo se tla ntshiwa ke mongwe wa lotso lwa ga Juta. Ene o tla rwala dipelodibotlhoko, le dipetso tsa morafe, le tsa merafe yotlhe, madi a ga Jesu a tla nna thuananyo ya maleo a ditšhaba tsotlhe.

Ka tsela eo ga bolawa Moše yo mogologolo, a ithuta, fa ene ka esi a se ka a tlhokega mo go kalo, a ithuta gore Modimo ke Morena le Kgosi, ke ene yo e leng Mothusi le Ngaka, Mopholosi le Mogolodi. Moše o ne a ithuta go opela sefela sa gagwe, jaaka re buisa mo Eks. 15:1-18, le mo go Doit. 32:1-43, le mo go Pes. 90:1-17. A ipolela a re: "Ka bopelotlhomogi jwa gago o gogile morafe o o o rekolotseng, wa o isa kwa felong fa go boitshepo ga gago, ka thata ya gago," Eks. 15:13; a ba a re: Modimo Morena o ne a belega Baiseraele ka diphuka tsa bontswi, a ba tlisa go ene, Eks. 19:4. Ke ka ntlha ya moo, fa a ne a kopa mo Moreneng le ka nako, fa a ne a bua ka ga bogale jwa Modimo le ka ga tatlhego ya batho, a re: "A botsalano jwa MORENA, Modimo wa rona, bo re okame. Tsweletsa tiro ya diatla tsa rona, ee, tiro ya diatla tsa rona o e tsweletse," Pes. 90:17. A le rona re rateng go nna barutwa ba ga Moše kajeno, re ithute go opela sefela sa go baka, go boka, go galaletsa, le go tlotlomatsa Modimo o le osi, o e leng Morena wa rona.

Re be re ithute go opela sefela sa Kwana ya Modimo. Fano go buiwa ka ga Jesu Keresete yo e leng "Kwana ya Modimo e e tlosang boleo jwa lefatshe," e le "Kwana e e tlhabilweng e na le tshwanelo ya go tshola thata le khumo le botlhale le nonofo le tlotlo le kgalalelo le poko," Tshen. 5:12. A go se nne ope, le fa e le a le mongwe fela yo o gopolang gore ke ene yo o medisitseng semela, gongwe yo o ungwisitseng leungo le fa e le le le lengwe fela mo kerekeng, gongwe mo phuthegong. Ke tshwanelo gore re rapele ka metlha, re be re ntshetse tiro ya go tsewedisa tsamao ya Efangele mo merafeng dikabelo. Ka tlhoafalo e kgolo re rata go dirisa dineo tse re di filweng mo diphuthegong tsotlhe fa gare ga Mazulu, le Batswana, le Maindia, le Majeremane, le Maesimane, le Maburu, le ba kwa Amerika. Re be re rate go itumelela maungo otlhe a a tlhagisiwang ke Morena ka pelo yotlhe, mme mo boitumelong jo bo ntseng jalo jwa rona ga re rate go lebala se Morena a se boleletseng barutwa ba gagwe, e rile barutwa ba gagwe ba boetse mo go ene ka boitumelo jo bogolo ka ntlha ya gore le mewa e e bosula e ba ikokobeletse. Ke fa Morena a ba bolelela, a re: "Fela lo se ka lwa itumelela

moo, fa mewa e lo ikobela, mme itumeleng, ka maina a lona a kwadilwe kwa magodimong," Luka 10:20.

Ke tshwanelo gore re itise tota, re se ka ra ipoka, le e seng go ikgodisa, e seng go ikgalaletsa, le e seng go itlotlomatsa. Ka metlha go na le maungo mo setlhareng a a butswang pele ga nako, a phatsima mo matlhong, o ka re: A setse a budule, mme fa o a tlhatlhoba sentle, a bodile mo teng. Maungo a a siameng a tlhoka nako ya ona gore a butswa sentle. Mo kerekeng, mo tirong yotlhe ya Morena letsatsi la thobo, gongwe letsatsi la go kgetla maungo ke letsatsi la bofelo. Ka letsatsi leo go tla bonala tota gore a a siameng, a nnete, le a e seng a a bodileng ke afe. Mo kerekeng go dirafala gantsi gore fa go begwa ka ga mongwe, go bolelwa tse di siameng ka ga gagwe, pegelo eo e ise e gatsiwe, go a utlwala, go bonala mo gae gore motho yoo o fapogile, o dirile sengwe se se sa tshwanelang. Gongwe moruti mongwe o a bolela gore mo phuthegong ya gagwe tsotlhe di tsamaya sentle, mme fa a tloga mo phuthegong eo, go tsena yo mongwe mo boemong jwa gagwe, ke fa go bonala tse dintsi tse di ledising fela.

Ga go na phuthego ya kereke ya Lutere e e ka ipokang gore mo go yona tsotlhe di tsamaya sentle fela. Le fa go buiwa mafoko a mantle mo lebitleng la moruti mongwe, gongwe mo letsatsing, fa a tsamaisiwa, le fa go buiwa gore nyaya, o dirile, o rutile mo go kalo gore ba phuthego ba itse tse ba tshwanetseng go di dira gore tiro e tswelele sentle, le fa go ntse jalo, ke tshwanelo gore phuthego eo e bone ka pejana modiredi yo mongwe, gore e direlwe le ka letsatsi le le latelang ka Lefoko la thero le ka disakaramente. Ke tshwanelo gore Morena Jesu Keresete a nne a tswelele go dira tiro ya gagwe mo phuthegong eo ka thero ya nnete ya Lefoko la gagwe, le ka tiriso ya disakaramente tse di abelwang ka fa Efangeleng ya gagwe. Ke gona re mo lebogang, fa Jesu a solofeditse gore "Efangele ya puso ya gagwe e tla rerwa mo lefatsheng lotlhe go nna tshupo mo merafeng yotlhe," Luka 24:14; go ya mo bokhutlong jwa lefatshe. Le fa re itse gore mo pusong le mo thobong e kgolo ya Morena go tla tlhabela badiri ka metlha, re itse ka tlhomamo gore Morena o tla tsoseletsa banna mo merafeng yotlhe, go ya a be a bowe, ke raya badiri ba ba tla ineelang go ya go dira tiro ya gagwe, Morena o tla ba bitsa, ba tswe mo merafeng e e farologanyeng, ba ipaakanyetse go dira tiro ya gagwe ka fa thatong ya gagwe ka fa nonofong e e tshwanetseng tiro ya Morena. Ke tshwanelo gore tiro ya Morena e dirwe sentle, go lengwe ka tshwanelo, go

jalwe peo e e siameng, go nosediwe, go tthagolwe ka tshwanelo. Leungo, tshegofatso e tla fiwa ke Morena, le fa tiro e dirwa ke yo montsho, gongwe ke yo mosweu, ke motho yo o tswang mo lefatsheng le lengwe, gongwe ke yo o goletseng mo lefatsheng la rona. Fela ke tshwanelo gore molaetsa wa Morena o boletwe, batho ba bilediwe mo tllhabologong e e isang mo boitshwarelong mo leineng la ga Jesu Keresete. Re rata go leboga Morena, fa a re dumelela go nna badiredi ba gagwe. Re rata go mo leboga, ka a ne a sa kopanye Efangele ya gagwe mo mebaleng ya matlalo, le e seng mo ditseleng tse di akantsweng ke batho. Morena o kopantse Efangele mo leineng la gagwe le e leng leina la Mopholosi wa batho ba merafe yotlhe. Tllhabologo e tshwanetse go rerelwa merafe yotlhe, e le tllhabologo e e isang mo boitshwarelong mo leineng la gagwe, ke boitshwarelo jo bo baakanyeditsweng botlhe ka loso lwa ga Jesu, le ka tsogo ya gagwe. Ka Efangele e batho ba merafe e e farologanyeng ba ne ba gogelwa mo tumelong mo sebakeng se se fetileng. Le ka se se tlang batho ba tla bona Mopholosi ka thero e e bokang Kwana ya Modimo e e tlosang bolelele jwa lefatshe. A go se nne ope yo o tla lapang go opela sefela sa Kwana ya Modimo! A rotlhe re opeleng sefela sa yona, mmogo le sona sa ga Moše, re se opele mmogo le badumedi botlhe, ee, mmogo le baengele mo legodimong, re nne re leboge Modimo, fa re baakanyeditse pholoso le botshelo jo bo sa khutleng ke Jesu Keresete. Amen.

9. Thapelo: "Ditiro tsa gago di dikgolo, di a gakgamatsa, Morena, Modimo, Mothatayotlhe; ditsela tsa gago di siame, ke tsa boammaaruri, wena Kgosi ya merafe. Ke mang yo o se kitlang a go boifa, Morena, a galaletsa leina la gago? Gonne o boitshepo o le wesi; merafe yotlhe e tla tla, e obamela fa pele ga gago; ka gonne ditiro tsa gago tsa tshiamo di senogile." Morena, o re thuse gore re se lape go opela sefela seo, re nne re go boke, re go tlotle, re go galaletse, re tlotlomatse ka ntlha ya tsotlhe tse o di re diretseng ka Morwao yo o rategang, Jesu Keresete, Morena, Morepholosi. Amen.

Thapelo ya Morena: Rara wa rona yo o mo legodimong ...

10. Sefela sa 20 - 20/-

A kagiso ya Modimo e e fetang tllhaloganyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen. Thero eno e kwadilwe ke E. A. W. Weber ka ngwaga wa 1996/2002/ 2014 Kgatiso le go rongwa ga dithero tseo go tshegediwa ke kopano e e bidiwang The Lutheran Heritage Foundation.